

杏一株如此數年杏有萬株鬱然成林羣蟲戲其下常無生  
草有如耘除也於是杏子大熟奉嘗語曰人欲買杏者不須  
來報之但徑自往取之一器穀便得一器杏嘗有穀往少而  
多取杏者卽有虎號嘯而逐之所得之穀救賑貧乏供給行  
旅歲消三百斛而所餘猶多一旦昇天去

漢武內傳武帝忽見青衣女子曰七月七日王母暫來帝問  
東方朔此何人朔曰西王母紫蘭室女傳命往來至日帝盛  
服立階下夜聞空中有簫鼓聲王母乘紫雲車駕九色班龍  
別有天仙皆長一丈王母上殿自設精饌以梓盛桃七枚帝  
食之甚美母曰此桃三千歲一實方朔曾三來偷桃矣

道藏輯要

三洞羣仙錄

辛

翼集四

山甫玄髮姚泓綠毛

抱朴子伯山甫居華山精思不食二百餘年玄髮不老後以  
其術授之於女子色如桃花有一老翁鬚眉皓白而來女子  
答之怪而問之女曰此是妾兒不肯用山甫之法致令衰老  
故杖之耳

廣記唐時有一僧居於南嶽夜見一物綠毛覆體直至座前  
僧曰貧僧禪居不撓生靈鬼神有知無相惱也其物曰子知  
有晉宋乎僧曰自晉至唐四百年矣其物曰師知有姚泓乎  
僧曰吾聞泓已死矣其物曰我泓也其時示之以死脫身逃  
遁遊行福地唯食柏葉遍身生毛